

# Ukaliatsiaq

**Qallunaatut atia:** Lækat (Hermelin)

**Latiinerisut atia:** Mustela erminia

**Tuluttut atia:** Shorttailed Weasel; Ermine; Stoat

**Sorlernut ilaava:** Nunap miluumasui

**Uumasooqatai:** Kiisortut

**Ilaqutai:** Toqutsisooqqakut



Ukaliatsiap nerisannaani avinngat pinngitsoorsinnaanngilai. Taamaattumik avinngat uumaffianni uumasuuvoq, tassa Washington Landimiit Blossvillep sineriaa tikillugu.

## Ilisarnaatai

Ukaliatsiaq aasakut aappaluttoq kajuartuusarpoq naavi sungarpaluttoq qaqungajattuullutik, pamiuata nuua qernertuulluni. Ukiumi qaallorissuusarpoq pamiuata nuua kisimi qernertuulluni. Pamiua 10 cm miss. takissuseqarpoq.

## Nerisai

Ukaliatsiap avinngat saniatigut nerisarai ukallit piaraat, timmissat manniilu.

### Paasissutissat

Uumaffii: Qaqqat

Takissusia: 20-30 cm (pamiua ilanngunnagu)

Oqimaassusia: 80-90 g

Nulusarfia: aasalernerani

Ataatsikkut erniusut: piaqqat 5-8

Piaqqisarpoq: ukiumut ataasiarluni

Naartusarpoq: qaammatit 11

### Nalunngiliuk?

Ukaliatsiaq Kalaallit Nunaanni nunami ujarattuumi uumasuuvoq, taamaattumilu ulluliortarluni.

Ukaliatsiaq takuneqarajuttarpoq ujaqqat qulaallugit akornisigullu pissigartoq, aamma kingulliiminik tutilluni nikussaartarpoq, qinerluni toqqupallattarlunilu.